


www.diarioaruba.com
The way business moves!
DIARIO
Online
 E Matutino di Aruba

Nunca politiconan a despreciami manera fin di siman cu a pasa

Fin di siman tras di lomba, mi a bisa **"ta basta!"**.

Mi a dicidi di bay papia cu algun politico y pa mi mala suerte, ningun di nan kier a bisami siquiera **"scrammmmm!!!"**

Mi a topa cu Marisol na diferente lugar riba nos isla.

Mi kier a puntre pakico e ta competi cu Mervin cu blusa cora.

Nada!!!

Mi kier a sa di Marisol, di con e ta tur caminda cu shovel den man, mientras cu e tin 6 hardinero pa haci trabao pe.

Nada!!!

Riba caminda di Savaneta pa San Nicolas mi a topa Mervin na diferente lugar.

Mi a bisa cu mi ta gusta con su cabey preto ta cay riba su schouder y ta contrasta bunita cu su blusa cora y lipnan cora.

"Ni un palabra".

Mi a puntre di con e ta banda di Booshi y poco mas pariba Ramon ta vigilando.

El a keda mirami cu mes mirada frieuw cu sonrisa riba cara.

Mi no por a wanta mas y a busca compania di Booshi, ya cu e si lo tin algo di bisami.

Mi kier a sa kico e ta haci banda di Monica.

Si ta amigo nan ta.

"E no a hiek".

Loke mi no a gusta di Booshi, ta cu el a keda punta dede riba mi, den forma di e basebolista di Orioles, Rafael Palmeiro.

Mi a spera cu e lo bisami: **"Nunca!!" "Nunca mi a gaña intencionalmente!!"**

Pero e no a habri boca, y keda mirami cu un hari di bora curason di hende.

Mi kier a bisa Booshi cu mi ta gusta e dashi strepia cu e tin bisti, pero mi a dicidi cu mi no ta dune e compliment aki.

Despues mi a topa Booshi atrobe.

Un biaha mas pero awor cu su polo geel bisti.

El a dunami un "wowo di puñal" y atrobe el a apunta su dede indice di man drechi riba mi manera e kier a bisa: **"Nunca!! Nunca intencionalmente mi a keda sin bisa e berdad".**

Mi a bira lomba bay lague, pensando con hende cu semper tin palabra na grandi, por bira muda diripiente, djis pasobra mi ta para su dilanti.

AWOR SI MI SA KEN TA K EN

Ramon tabata poco mas pariba vigilando, pasobra e no a gusta cu Monica tabata banda di Booshi, y cu Mervin y Marisol no tabata mucho leu tampoco.

Ademas di a topa Monica aki, mi a mira Monica tur caminda, hasta riba un truck.

Mi kier a puntra Monica di con tur caminda su color ta cambia.

Mas leu bo ta, mas shinishi su color ta.

Mas cerca bo yega, bo ta ripara cu su color ta cambiando.

Mi kier a bise cu mi a gusta e mescla di color den su cabey, y e smile atractivo cu e tin riba su cara.

Mi kier a bise cu riba e truck, el a parce e Monica di un color y no di color cu ta cambia.

Monica a despreciami tambe

Ora mi a mira Ramon, mi a bisa cu **"shon ministro si lo bisami kico ta pasando"**.

Ramon a keda mi dilanti cu braza habri, y mi a kere sigur cu e lo brasami y bisami **"ruman, mi ta contento di mirabo aki"**.

No..... Ramon tambe a perde lenga.

El a keda braza habri, cu un medio sonrisa riba cara, y ni rosea e tabata hala.

Asina bon e por a domina su respiracion.

Mi no a spera esey di Ramon, y mi a bise tambe, prome cu mi a cana bay lague.

Mi a sigui rek pia, trata na baha poco peso, canando mas cu mi sa cana durante carnaval y ken por a kere cu mi lo a topa cu pader Mando.

Mi a topa cu Pader, pero a keda masha asombra di mira cu e tin man na curason.. no....., na e otro banda di pecho.

Loke a ponemi spanta ta cu e tabata tin su mirada claba na laira ta

Mira Cielo.

"Ta atake di curason e ta hayando?"

El a keda cu su mirada na laira y su man robéz cruza poni na su banda drechi.

Mi a keda boca habri, pasobra tin hende tambe cu nan curazon ta na banda drechi na lugar di banda robéz, y aki mi tin un personahe cu lo ta un di e tanto milnan.

E tabata paraliza y no a dirigi palabra na mi.

Su bista a ponemi corda riba **"Miracielos"**, e nomber di cariño cu tabata tin antes pa prison.

Berdad ta cu na otro banda por a mira portanan di cel di KIA, y mi a haya razon riba e pensamiento cu **"Padru tambe kier mira porta di Miracielos habri pa hopi"**.

Como cu e no a preocupa di siquiera cumindami, mi a bay lague cu su **"dolor di curason"**.

Otronan cu mi a topa fin di siman tambe a haci como si fuera mi ta biento.

Mi a bin hayami cara cara cu shon Kenneth Jong.

Mi a ripara cu su cara tabata hopi mancha y kier a puntre ta kico a pasa, y si ta kima el a kima.

Kenneth no a haci caso di mi.

MI A DAL UN DINAN UN SCHOP DEN CARA

Algun dia pasa mi a topa Dirkie drumi abao.

Cu tur e golpi cu e tabata tin den su curpa, e no a saca un **"ahhh"**.

Mi a pensa cu e tabata burachi, of cu rivalnan politico lo a dal e algun golpi cu arma, pero Dirkie a keda boca cera, wowonan habri, y cu tur e maltrato cu el a haya, el a keda cu un smile.

Mi a dal e un schop y cana bay lague ey bao.

Mi no a gusta tampoco e mirada cu Andin y Alan a dunami.

E miradanan tabata manera falso y cu cara serio.

Mi kier a adverti nan pa no cana mucho cu hende bisti na cora rond di nan, pasobra bo nunca sa di unda e toronan ta sali.

Pero tur dos a keda mirami cu cara serio.

Mi no por a logra un sonrisa riba nan cara, y nan tur dos tambe a haci como si fuera mi'n ta existi.

Ta kico mi a haci e hendenan aki?

Ta pasobra mi ta traha cu corant nan mester tratami asina?

Mi a topa cu esun cu **"si ta cumpli"** cu mi.

Shon Rudy mi a mira rond di Aruba y tur caminda mi a trata di haya un conversacion cune.

Mi kier a bisa Shon Rudy cu poco poco e ta tratando di parce su ruman, —cu tur hende a stima,— mas y mas.

Pero shon Rudy a keda manera un blokki ijs, cu su wowonan claba riba mi.

E ni a cumpli di debilbe mi saludo.

Awor mi sa cu kendenan mi ta trata, y no por a kere cu Sr. Nel lo ta mescos cu tur di nan menciona aki riba.

Mi a yega cerca di Sr. Nel, pero su man drechi tabata na laira na un manera menasante.

Mi kier a bise pa no pose asina, pasobra hende lo kere cu e ta pertenece na **"Black Power"**, pero Sr. Nel tambe a haci manera **"sushi a yega"**, y mi a cana bay.

E manera cu mi a wordo trata pa e politiconan aki, a pone cu e imagen cu mi tabata tin di tur di nan a cambia.

Ora nan mester di bo, nan sa unda pa hayabo, pero ora cu bo mester di nan, pa nada bo ta haya nan, y ora cu bo topa cu nan, ni boca nan ta habri pa siquiera bisabo: **"con ta bay?"**

For di e momento aki, mi a dicidi cu **NUNCA MAS**, tambe cu **"nunca mas intencionalmente"** mi ta papia cu borchí di campaña, di politiconan, cu mi topa riba caya, pasobra ningun ta haci caso di bo.

Si boso kier mi voto, regalami 1000 florin pa mi pone un bandera riba mi auto, 1000 florin pa mi pone sticker riba mi auto, 10 mil florin pa mi pone borchí den mi cura of na mata di kwihi den cura di cas, 10 mil florin pa mi bisti T-shirt politico dia y anochi, 25 mil florin pa mi deposita mi voto riba bo.

Tur cos paga na efectivo, riba mesa y no bao di mesa.

Juby Naar.